

公開組

【冠軍】

讀《閱微草堂筆記·業鏡與心鏡》有感
李裕韜

對映菱光寶匣開，洞然神物照靈臺。
鑑前道貌欺塵眼，像後真形現鬼胎。
色相虛空皆幻化，人心晦偽每疑猜。
劇憐司鏡非陽吏，只在幽冥作仲裁。

評語：筆力遒勁，語重心長，足以警世。

【亞軍】

杭州退省庵

杜秉國

三潭綠萼為誰栽，閑放堂前幾度開。
兒女心腸餘悔憾，英雄肝膽挽傾頽。
墨磨楯鼻龍蛇動，血灑江頭寇敵摧。
淡薄封侯乞退省，好賒微命寫寒梅。

評語：詠清末彭玉麟故居及情事，立意溫醇，措辭典雅。

【季軍】

虎門懷古

潘少孟

遺跡依稀認劫灰，百年歌泣動深哀。
曾燒流毒驚夷客，為禦強梁築炮臺。
殉國豈無忠義士，廢官自毀棟樑材。
昔年沈恨今憑弔，賊子當朝是禍胎。

評語：悽愴沈鬱，大義凜然。

【優異獎】

微信朋友圈

李敬邦

雁隔天涯爾莫哀，樂乎友自遠方來。
馳箋遍達拿雲手，跟帖頻催詠絮才。
圈轉年輪枝結實，網編相冊鏡非臺。
屏光走馬心誰繫，勝卻花間獨舉杯。

評語：構思精到，詠情雋永。

休漁期

杜鑑深

下碇停舟曬罟籠，星斑何乃覓西東。
劇憐鷓首風霜露，閒戲牌章白發中。
大海雖深魚且杳，老饕未饜欲無窮。
馮驩彈鋏歸來日，不事田文事釣翁。

評語：諧趣生動，描述傳神。

菠蘿包

何譽丙

隔巷香傳嗜意豐，鱗紋龜背出爐紅。
軟輕握裏真疑絮，薄脆沾時慎向風。
每選無非尋舊味，已成不二笑癡翁。
芸芸何物能相稱，厚切牛油雪未融。

評語：粗中有細，尤善戲謔。

避疫常調膳於家居感賦

黃山河

買得甘腴作饌材，休教節物負銜杯。
倘逢郭索藏重殼，奚必鱸魚有四鰓。
治國小鮮憑老子，依單新筍閱袁枚。
箇中滋味殊非俗，異日何妨聚眾來。

評語：外戲謔而內有典則。

鯤化鵬歌

楊昆倫

幾向湖陬掉尾回，本來覆水不容杯。
心期遠在天池畔，體態長妨碣石堆。
項領一朝生羽翼，風雲萬里絕塵埃。
可憐四顧無儔侶，寂寞南溟煙樹隈。

評語：筆觸細膩，氣度不凡。

【特別獎】

春梅

黃秉勤

臨微泰至建寅回，霰雪飄零嶺上梅。
傲骨疎枝饒石徑，端容素蕊冷花魁。
綃衣月白雲鬟濕，玉臂冰清錦幹嵬。
蟹菊霜天偏早種，方春幸有耐寒胚。

評語：借物抒情，結語敦厚。

探月

潘金山

夜色溶溶萬象空，誰人銜夢向蟾宮。
追星玉兔奇緣巧，拭鏡金娥異術工。
仙徑掘來三寸璞，靈槎吐出一彎虹。
巡天萬里佳音到，坐月高吟興未窮。

評語：寄情天外，清新可喜。

*優異獎及特別獎排名按姓氏筆畫序

第三十一屆

全港詩詞創作比賽

獲獎作品

律詩



公共圖書館自一九九一年起舉辦「全港詩詞創作比賽」，單年比詩，雙年比詞，旨在提高市民之中國語文運用及韻文欣賞的能力。今年舉辦的「第三十一屆全港詩詞創作比賽」，已是第十六度的「律詩比賽」。評審委員有何文匯教授、陳煒舜教授、黃坤堯教授及劉衛林教授。

比賽分學生組及公開組，題材由參加者自定，五言或七言律詩不拘，用韻則限用「一東」及「十灰」二韻。是屆的參賽者非常踴躍，共收到八百多份參賽作品。學生組參賽者來自各大專院校及高中學生；公開組參賽者則來自社會不同階層。是屆參賽者的作品水準甚高，評審委員經初選、複選，反覆討論，才能決定名次。為確保評選公正，整個評審過程均以糊名方式進行。評判團更約見學生組入選參賽者，並請學生們即席對聯，才定出優勝作品。

學生組

【冠軍】

過新亞中學

劉浚傑 香港中文大學

一往宿儒吾道東，此非陳蔡歎時窮。
圓亭聚眾收殘局，蠻島傳經推至功。
水載芥舟知用舍，身藏人海振癡聾。
簷間歷歷鳴廊雨，待看排雲日再中。

評語：詠國學承傳，佈局精密，詞氣恢宏，足以振奮人心。



【亞軍】

飲豆漿懷過世祖母

李靈枝 珠海學院

清香今滿屋，渺渺向蒼穹。
憶昔磨黃豆，催漿落竹筒。
杯前蒼鬢影，夢裏故園風。
慈貌留心上，餘芳淺盞空。

評語：觀物思人，瑣事不忘，悲懷可見。

【季軍】

過大明宮遺址

馮一涵 香港中文大學

長安閣道大明宮，弔此盛唐武功功。
斷碣殘碑獨冷落，野花雜草自鴻蒙。
感時吟詠斜暉下，憂世唏噓夜雨中。
無盡興亡莫嗟嘆，抬頭日月古今同。

評語：感嘆興亡，幽情洋溢。



【優異獎】

舊情

余筠淇 珠海學院

莊生曉夢何須覺，只怕醒時萬念空。
一夜春宵期永世，三更滿月訴深衷。
餘情醉憶蒼茫外，舊日低迴寂寞中。
憾恨悲歡猶未歇，閒愁兩處思無窮。

評語：纏綿情多，愁懷不盡。

秋夜步城門河邊有感

洪櫻淇 香港樹仁大學

連綿細雨亂霓虹，舉傘身行水霧中。
廣廈穿雲沾暮色，殘花帶露染愁紅。
三更苦讀方成器，萬里洪流且入東。
夜靄沈沈終得散，天晴總會現天弓。

評語：愁易生，亦可解，是勵志之作。

訪宋王臺詠宋臺秋唱

黃昱賢 香港大學

燕寒夜冷雁南來，鶴唳蠻煙遍九垓。
故國夢華河塹隔，龍津暮影水門開。
孤臣異代空垂涕，逐客秋懷聊唱哀。
古道西風殘照裏，黃花敗葉掃空臺。

評語：筆力雄健，用典貼切。

隔離

黃頌軒 香港中文大學

新冠肆虐泣城東，囚楚難眠望疫終。
陶令席吟知夜永，阮生車哭嘆途窮。
廿年修學人流寓，百業拋殘境未通。
破釜一心同抗癘，家家遍覓葛仙翁。

評語：嗟嘆人事，仁言藹如。

清明夜遊

鄭果 香港中文大學

春來欲盡連天霧，落日庭園杏早紅。
湖傍清燈花奏雨，月臨幽徑鳥吟風。
山間舞柳歸前水，亭上輕煙弔遠空。
迢遞鄉愁無達處，音書寄意語孤鴻。

評語：盡是暮春情景，撩人愁緒。

